

彊邛叢書



蜨巖詞目錄

卷上

六州歌頭

瑞龍吟

多麗

蘭陵王

摸魚兒

金縷詞

沁園春

蘇武慢

風流子

疏影

望海潮

解連環

春從天上來

南浦

花心動

綺羅香

眉嫵

喜遷鶯

石州慢 二

水龍吟 七

憶舊遊

齊天樂 二

桂枝香

木蘭花慢 二

眞珠簾

卷下

丹鳳吟

高陽臺

百字令 二

玉蝴蝶

東風第一枝

陌上花

定風波

八聲甘州

聲聲慢 二

掃花遊

水調歌頭 二

鳳凰臺上憶吹簫

玉漏遲

一枝春

滿江紅二

意難忘

露華

孤鸞

江城梅花引

洞仙歌

最高樓

風入松二

婆羅門引

江神子三

感皇恩

行香子六

破陣子

定風波

蝶戀花

漁家傲

臨江仙三

唐多令

虞美人

南鄉子二

鵲橋仙

二

鷓鴣天

三

浪淘沙

摘紅英

戀繡衾

惜分飛

太常引

朝中措

憶秦娥

二

清平樂

四

好事近

謁金門

三

菩薩蠻

二

浣溪沙

五

點絳脣

昭君怨

如夢令

鷓鴣天

踏莎行

二

蛻巖詞卷上

河東 張 翥 仲舉

六州歌頭

孤山尋梅

孤山歲晚石老樹查牙逋仙去誰爲主自疏花破冰芽
烏帽騎驢處近修竹侵荒蘚知幾度踏殘雪趁晴霞空
谷佳人獨耐朝寒峭翠袖籠紗甚江南江北相憶夢魂
賒水繞雲遮思無涯又苔枝上香痕沁么鳳語凍蜂
衙瀛嶼月偏來照影橫斜瘦爭些好約尋芳客問前度
那人家重呼酒摘瓊朶插鬢鴉喚起春嬌扶醉休孤負
錦瑟年華怕流芳不待回首易風沙吹斷城笳

瑞龍吟

癸丑歲冬訪游弘道樂安山中席賓米仁則用清真
詞韻賦別和以見情

鼇溪路瀟灑翠壁丹崖古藤高樹林閒猿鳥欣然故人
隱在溪山勝處久延佇渾似種桃源裏白雲窗戶燈
前素瑟清尊開懷正好連牀夜語應是山靈留客雪
飛風起長松掀舞誰道倦途相逢傾蓋如故陽春一曲
總是關心句何妨共磯頭把釣梅邊徐步只恐怱怱去
故園夢裏長牽別緒寂寞閒針縷還念我飄零江湖煙
雨斷腸歲晚客衣誰絮

多麗

爲友生書所見

小庭階簾櫳婀娜蓬萊恨
恩恩歸鴻度影東風搖蕩情
懷不多時見他行過霎兒後
依舊迴來銀鋌雙鬟玉絲
頭導一尖生色合歡鞵麝香粉
繡茸衫子窄窄可身裁
偶回頭笑渦透臉蟬影籠釵
憶疏狂隨車信馬那知
淪落天涯荳蔻初可憐
春早菖蒲晚難見
花開紅葉波
深綵樓天遠浪憑青鳥信
音乖等閒是這番迷眼無處
可安排行雲斷夢魂不到空賦陽臺

又

清明上巳同日會飲西湖壽樂園

鳳凰簫新聲遠度蘭橈漾
東風湖光十里參差綠
港紅

橋暖雲醺鬱金衫色晴煙抹翡翠裙腰罨畫名園鬧紅
芳榭蒲葵亭畔綵繩搖滿鴛鴦落英堪藉猶作殢人嬌
漬羅袂莫揉痕退生怕香銷憶當年尊前扇底多情
冶葉倡條浴蘭女隔花偷盼修禊客臨水相招舊約尋
歡新聲換譜三生夢裏可憐宵縱留得楝花寒在啼鴂
已無聊江南恨越王臺下幾度迴潮

又

西湖汎舟夕歸施成大席上以晚山青爲起句各賦

一詞

晚山青一川雲樹冥冥正參差煙凝紫翠斜陽畫出南
屏館娃歸吳臺遊鹿銅仙去漢苑飛螢懷古情多憑高

望極且將尊酒慰飄零自湖上愛梅仙遠鶴夢幾時醒
空留在六橋疏柳孤嶼危亭待蘇堤歌聲散盡更須
攜妓西泠藕花深雨涼翡翠菰蒲軟風弄蜻蜓澄碧生
秋鬧紅駐景采菱新唱最堪聽□一片水天無際漁火
兩三星多情月爲人留照未過前汀

蘭陵王

臨川寓舍聞箏

晚風惡牆外楊花正落鞦韆罷人在瑣窗猶怯春寒下
簾幕多情倦繡作恰了棠梨半萼移金雁應是自調盡
寄深情與絃索數聲白翎雀又歇拍多時嬌甚彈錯
新聲舊譜多忘卻想紅香憔悴錦書遼邈恹恹前度見

略略甚如在天角
霧閣閉銀鑰柰夢斷行雲青鳥難
託三生書記情緣薄記舊家歌舞那時行樂桃枝人面
問酒家負舊約

摸魚兒

送黃任伯歸豐城時任伯先放其妾還家故及

正怱怱楚鄉秋晚孤鴻飛過南浦同來桃葉堪惆悵一
舸載春先去愁絕處問那曲闌干曾聽人低語今宵最
苦向楓樹溪橋蘆花野館翦燭臥聽雨吳霜鬢破帽
西風怎護絲絲都是離緒舊情頓冷新愁重總付墜鞭
詞譜君記取待雪夜相思乘興柴岡路唱子和汝耍款
段隨車輕盈喚酒重爲國香賦

又

臨川春遊連日病酒賦此止之

過花朝淡煙輕雨東風還又春社客懷不斷還家夢只
泥酒杯陶寫孤館夜甚濃醉無人知道歸來也蘭燈半
炧任賦就魚牋絃拋玉軫誰念倦司馬長安市幾度
攜尊命駕空驚遊興衰謝醉鄉天地無今古爭得一襟
蕭灑春縱冶便不飲從教團雪揉花打觥籌已罷笑螺
羸螟蛉吾今真止爲報獨醒者

又

春日西湖汎舟

漲西湖半篙新雨麴塵波外風軟蘭舟同上鴛鴦浦天

氣嫩寒輕暖簾半捲度一縷歌雲不礙桃花扇鶯嬌燕
婉任狂客無腸王孫有恨莫放酒杯淺垂楊岸何處
紅亭翠館如今遊興全懶山容水態依然好惟有綺羅
雲散君不見歌舞地青蕪滿目成秋苑斜陽又晚正落
絮飛花將春欲去目送水天遠

又

題熊伯宣藏梅花卷子

記西湖水邊曾見查牙老樹如此冰痕冷沁苔枝雪的
皦數花纔試天也似愛玉質清高不入閒紅紫孤山處
士總賦得招魂煙荒雨暗寂寞抱香死春風筆休憶
深宮舊事添人多恨多思墨池雪嶺三生夢喚起縞衣

仙子仍獨自伴瘦影黃昏和月窺窗紙聲聲字字寫不盡江南閒愁萬斛訴與綠衣使

又

王季境湖亭蓮花中雙頭一枝邀子同賞而爲人折
去季境悵然請賦

問西湖舊家兒女香魂還又連理多情欲賦雙蕖怨閒
卻滿匳秋意嬌旖旎愛照影紅妝一樣新梳洗王孫正
擬喚翠袖輕歌玉箏低按涼夜爲花醉鴛鴦浦淒斷
凌波夢裏空憐心苦絲脆吳娃小艇應偷采一道綠萍
猶碎君試記還怕是西風吹作行雲起闌干謾倚便載
酒重來尋芳已晚餘恨渺煙水

又

賦湘雲

問湘南有雲多少不應長是爲雨平生宋玉緣情老羸
得鬢絲如許歌又舞更一曲琵琶昵昵如私語閒悲浪
苦怪舊日青衫空流淚滿不解畫眉嫵空凝佇十二
峰前路阻相逢知在何處今朝重見春風手仍聽舊彈
金縷君且住怕望斷蘅臯日暮傷離緒新聲自譜把江
北江南今愁往恨盡人斷腸句

又

元夕吳門姚子章席上同柯敬仲賦敬仲以虞學士
書風入松于羅帕作軸故夫語及之楚芳吳蘭二妓

名

記蘇臺舊時風景西樓燈火如畫巖城月色依然好無
復綺羅遊冶歡意謝向客裏相逢還又思陶寫金尊翠
罈把錦字新聲紅牙小拍分付倦司馬繁華夢喚起
燕嬌鶯妬肯教孤負元夜楚芳玉潤吳蘭媚一曲夕陽
西下沈醉罷君試問人生誰是無情者先生歸也但留
意江南杏花春雨和淚在羅帕

又

錢萬戶宜之邀予賦瑤臺景

甚瑤臺翠鸞雛小風流占斷妍景數聲何處啼春勝簾
捲曉窗人靜天氣困梳未穩綠鬟倭墮臨妝鏡懶羞倦

整待鉸箇金花眉尖雙雁還怯剪刀冷
仙家好十二行雲路迴牢籠芳夢不定多情正要人拘管無奈綠昏
紅暝乘酒興攜兩袖天風飛上蓬萊頂闌干獨凭爲喚
玉笙來霓裳按舞和月醉花影

金縷詞

送王季境還廣陵

西子湖邊路看依然水光山色自宜晴雨天上歸來重
載酒惟有舊盟鷗鷺笑鬢影星星如許公子華筵涼似
水更綠鬢窈窕歌金縷留晚醉看眉嫵 三生書記真
豪舉把平生香奩軟語錦囊佳句君到淮南明月夜爲
問崔娘安否 翻作錦箏新譜只恐驚鴻花外起趁行

雲直過滄江去飛不到斷腸處

又

送上官子東之崑山州幕官

煙草長洲苑渺姑蘇舊遊麋鹿歲華云晚多少吳宮花
月恨春去春來不管只付與行人淒斷君去風流賓幕
裏把今情古意供裁翦珠唾溼玉煙暖相逢儘看金
杯滿信人生好懷有幾夢長緣短白髮崢嶸三千丈底
用雲揉雨染且鬪取尊前強健爲問浮槎還到否便乘
之直上三山遠看瀛島水清淺

沁園春

讀白太素天籟集戲用韻效其體

客汝知乎載酒輕舟看花小車勝炎州出使瘴浮征旆
禁門待漏霜滿朝鞞歲去堂堂老來冉冉瓶雀飛時手
怎遮平生事歎山林迹遠霄漢程賒從渠夢蝶疑虵
得放懶還須自在些甚天荒地老銅臺歌舞水流雲在
金谷豪華客問先生歸宜早計醉後之言可信耶鷗盟
在任漁蓑江上雨細風斜

又

泉南初度伯時將北歸諸友宴次賦此留別

天上玉堂海外瀛洲山中蛻巖甚六十四歲出持使節
八千餘里來駐征驂香火緣深功名意薄夢覺仙家雪
滿簪桐花社喜酒邊鶯燕詩外雲嵐錦堂容我清酣

擁畫燭金鉤手屢探怪朗吟御史笑回紅粉送歸司馬
淚溼青衫蜀魄春多塞鴻秋遠無限離情老不堪空留
意在水光山色江北江南

又

廣陵九日與劉士幹成元璋泛舟邗溝

何許登臨路繞蕪城岡連楚臯愛流雲低響歌催瓊樹
微波照影人豔仙桃松院移尊柳橋攜袖隨處蘭舟且
暫捎秋無際望空江雁遠落木天高不妨左手持螯
更右把金尊送濁醪歎雞臺草暗淒然興廢龍山煙冷
老矣英豪白髮寧饒黃花任插要裏西風破帽牢劉郎
醉把吳牋笑擘試與題糕

又

次韻李元之聽董氏雙絃

誰喚嬌嬈斜插雙絃華筵乍開愛玉織輕軋半籠翠袖
歌喉緩引暗點鴛鞵胡部新聲樂工巧製寫出龍沙馬
上哀哀何似似離鸞驚起白雀飛來 丁寧擊節金釵
要細聽春風且慢催正宮商分犯拽歸雙調伊州入破
擷徧三臺畫扇香收羅巾汗溼愁是雲兜醉後回花閒
客任鸞綃纏髻更盡餘杯

蘇武慢

對雪

凍雨跳空朔雲屯地陡覺夜寒無賴誰從藥闕宴罷羣

仙一樣佩零珠解應喚馮夷起舞回風攪碎渺茫銀海
倚南窗清思盈襟看盡整容斜態君試問白羽鳴弦
青貂束錦千騎獵歸煙塞何如倦客蠟屐枝筇乘興竹
邊梅外隨處堪尋賣酒人家春渚水鄉挑菜趁湖山晴
曉吟魂飛上玉峰瑤界

又

歲晚再雪仍用前韻

歲晚江空雪飛風起老境若爲聊賴家人解事準備深
尊旋遣夜窗寒解萍梗孤蹤幻影浮生萬里喜還閩海
但囊中留得詩篇爛寫水情山態真比似一箇冥鴻
南來北去閱盡幾重關塞名韁利鎖絆殺英雄都付醉

鄉之外惟不能忘一舸吳淞鱸膾豉羹菜且今宵還
我冰壺天地眼空塵界

風流子

臨川歲五月祠神以中末二旬之六七八日張燈遊
人特盛回憶武陵元夕

荷雨送涼颿炎塵淨三市影燈宵看珠珞翠繩燄搖冰
盃綵棚花架光射星橋洞天好笑聲遮畫扇歌韻合鸞
簫瓊樹影中月窺端正雲羅香裏人鬪嬌燒 依稀元
夜影銅壺短還又露灑煙飄空遣酒懷搖蕩羈思無聊
想驄馬鈿車俊遊何在雪梅蛾柳舊夢難招醉掩重門
半釭蘭燼紅銷

又

賞箏妓崔愛

梨園供奉田卿卿解寫入十三絃聽促彈寶柱暮催行
雨放嬌銀甲春繞飛煙可人處鳳聲啼玉碎燕尾點波
圓宜與畫看徽容妍麗欲裁詩寄鶯思纏綿多情曾
相遇歸舟字夢裏尙記遊仙好倩鈿牀纖手移近尊前
儘何處教吹玉簫明月此情追憶錦瑟華年多少舊愁
新恨知爲誰傳

疏影

王元章墨梅圖

山陰賦客怪幾番睡起窗影生白縹緲仙姝飛下瑤臺

淡佇東風顏色微霜恰護朦朧月更漠漠暝煙低隔恨
翠禽啼處驚殘一夜夢雲無迹惟有龍煤解染數枝
入畫裏如印溪碧老樹枯苔玉暈冰圈滿幅寒香狼藉
墨池雪嶺春長好悄不管小樓橫笛怕有人誤認真花
欲點曉來妝額

望海潮

丁巳清明日登定海縣招寶山望海

扶桑何許蓬萊何處滄海一望漫漫精衛解填鼉鼉可
駕凌波直度三韓雲氣有無閒只是天是水無地無山
鼉屬鼉掀颶風俄起晝生寒從今不數鯢桓羨秦人
采藥龍伯垂竿槎信未來珠光暗徙羣仙約我驂鸞長

嘯壯懷寬且振衣絕頂醜酒長瀾揮手相招片帆飛趁
暮潮還
解連環

留別臨川諸友

夜來風色歎青燈素被早寒欺客想寂寞人在簾櫳望
鴻雁欲來又催刀尺秋滿關河更誰倚夕陽橫笛記題
花賦月此地與君幾度遊歷江頭楚楓漸赤對離尊
飲淚難問消息趁一舸千里東歸眇天末亂山水邊孤
驛晚晚年華悵回首雨南雲北算今古此情此恨甚時
盡得

春從天上來

廣陵冬夜與松雲子論五音二變十二調且品簫以
定之清濁高下還相爲宮犁然律呂之均雅俗之應
也不覺漏下月滿霜空神情爽發松雲子吹春從天
上來曲音韻淒遠予亦飄然作霞外飛仙想因倚歌
和之用紀客次勝趣是夕丙子孟冬十又三夕也

嫋嫋秋風聽響徹雲閒彩鳳啼雄羸女飛下玉佩玲瓏
腸斷十二臺空渺霜天如海寫不盡楚客情濃燭銷紅
更鏘金振羽變徵移宮揚州舊時月色歎水調如今
離唱誰工露葉殘蛾蟾花遺粉寂寞瓊樹香中問坡仙
何處滄江上鶴夢無蹤思難窮把一襟幽怨吹與魚龍

又

同王繼學憲使賦

十里紅樓問聲價如今誰滿揚州白髮書記此日重遊
聽取席上名謳擁冰絃斜佇更爲我斂笑凝眸覓黃騮
看端端怎比楚楚風流殷勤研綾小草寫不盡宮妝
一段春柔淡月疏花知誰消受幾度簾捲香收怕巫娥
歸去空惆悵夢斷情留把離愁付行雲行雨楚尾吳頭
南浦

艤舟南浦因賦題

花落楚江流過西山雨漲漁村無路雙槳載愁來蘋沙
外惟有盟鷗相覩春波碧草送君曾是傷情處依舊朝
雲飛畫棟秋滿鶴汀鳧渚斜陽三兩人家□青旗影

裏炊煙一縷絃索夜深船淒涼聽還似西風湓浦征鴻
去盡夢回明月生煙樹如此山川無限恨都付一尊懷
古

花心動

劍浦有感

花信風寒綺窗深窓窓禁煙時節燕子乍來宿雨纔晴
滿樹海棠如雪黛眉準擬明朝畫燈花翦妝奩雙疊負
佳約鵲還誤報燕應羞說寶鏡將圓又缺從澀盡銀
簧怕吹嗚咽一霎夢魂也喚相逢依黯斷雲殘月古來
多少春閨怨看薄命無人如妾軟綃帕憑誰寄將淚血
綺羅香

雨中舟次洹上

燕子梁深鞦韆院冷半溼垂楊煙縷怯試春衫長恨踏
青期阻梅子後餘潤留寒藕花外嫩涼消暑漸驚他秋
老梧桐蕭蕭金井斷蛩暮薰篝須待被暖催雪新詞
未穩重尋笙譜水閣雲窗總是慣曾聽處曾信有客裏
關河又怎禁夜深風雨一聲聲滴在疏篷做成情味苦
眉嫵

七夕感事

又蛛分天巧鵲誤秋期銀漢會牛女薄命猶如此悲歡
事人間何限夫婦此情更苦怎似他今夜相遇素娥妒
不肯偏留照漸涼影催曙私語釵盟何處但翠屏天

遠清夢雲去縱有閒針縷相憐愛絲絲空綴愁緒竊香
伴侶問甚時重畫眉嫵謾鉛淚彈風都付與洗車雨
喜遷鶯

瓊花

東風吹盡但一片綠陰空留春恨后土祠荒飛瓊謫久
還喜玉容堪認二十四橋夜月二十四番花信便載酒
怕芳菲易老陰晴難穩 嬌困羞起晚佇立畫闌淨洗
閒脂粉沈水濃熏蜂黃淡染自有絕塵香韻也知世閒
無對肯許浮花相近鳳簫遠待數枝折與玉峰人問
石州慢

春日雨中

煙雨輕陰庭院悄寒晴意難準社前燕子歸來恰換一
番花信春光全在杏花紅鬧枝頭雙鸞銜上金釵鬢待
到盡開時又膩脂成粉堪恨西園撲蝶人閒芳徑踏
青鞵潤簾影惜惜竟日膏騰如困惜花中酒尋常過了
年年情多那得離愁盡翠被不成溫滿薰篝蘭燼

又

題玉笙手卷

仙去緱山宴罷武夷瓊響吹徹叢霄舊樣親傳琢就玉
煙凝白悠揚彩鳳恰從雲杪飛來數聲又趁鴛鴦歇零
落碧桃花點春風如雪清絕更宜秦女銀箏喚取楚
娥瑤瑟旋炙嬌簧只愁夜深寒咽相看老矣剩須陶寫

留連尊前遞把紅牙節歸去畫船時滿西湖明月

水龍吟

賦情雲

無心卻恁多情閒愁長向眉尖聚牢籠不定爲誰留戀
爲誰歸去半餉花陰霎兒月暝幾番日暮被東風攪散
離愁惹斷又還趁歌聲駐只恐佩環臥冷好重將繡
帷調護何人得似曉妝鬟髻春嬌態度縹緲尊前朦朧
眼底非煙非霧把柔情一縷都隨好夢作陽臺雨

又

傅淵道宅上賞紫牡丹

紫雲何處飛來仙家別有藏春洞刻繒紋皺鏤檀色膩

薰臍香重穀雨初晴榆煙新換棟風微動是花姑養就
韓仙染出還分與人閒種好與密籠繡幄護玉環三
生妖夢只愁今夜綠叢月老珠房露凍便喚秋娘重澆
卯酒緩歌低送倩紅鸞與約韶華且住作尊前供
又

次韻王本中賦樓子芍藥

寶樓十二玲瓏仙家只在雲閒任金盤舞罷羅裙襞
乘風欲去畫檻移春彩鸞銜信幾番延佇看釵筵疊萼
天然富貴妝臺近有人妒句引廣陵遺恨倩流鶯爲
花低訴年年長是芳菲時候滿城煙絮春色三分落紅
千片總成塵土向月明空羨雙雙睡蝶宿花房露

又

西池敗荷

水宮仙子歸來爲誰獨立西風背
凌波夢斷可憐零落一匳環
佩雨葉敲寒露房倒影秋聲驚
碎問西亭翠被將愁何處空留
得餘香在最愛雙飛白鷺鎮相依
蓼邊蘋外舞衫歌扇有人繡出
水情雲態西子湖邊越娘舟上
憶曾同采甚人今未老花應依
舊約明年再

又

廣陵送客次鄭蘭玉賦蓼花韻

芙蓉老去妝殘露華滴盡珠盤
淚水天瀟灑秋容冷淡憑誰點
綴瘦葦黃邊疏蘋白外滿汀煙
穽把餘妍分與

西風染就猶堪愛紅芳媚
幾度臨流送遠向花前偏
驚客意船窗雨後數枝低
人香零粉碎不見當年秦淮
花月竹西歌吹但此時此處
叢叢滿眼伴離人醉

又

鄭蘭玉賦蠟梅工甚予拾其遺意補之

玉人梳貌堪憐曉妝一洗鉛華盡
此花應是菊分顏色
梅分風韻萼點駝酥口攢金磬心凝檀粉甚
女貞染就
仙衣絕勝蜂兒重鵝兒嫩
說與玉龍莫品怕宮波一
般流恨故人堪寄折枝代取
江南春信沈水全熏燐絲
密綴額黃深暈乍燕姬未識是花是蠟
笑俚人問

又

聽房氏自然歌求詞爲賦

春風瓊樹香中數聲恰似流鶯囀歌塵飛下落花起舞
驪珠脫串荳蔻珠簾牡丹雪嶺小桃人面是自然絕藝
天然書譜霓裳序六么徧獨占二分月色向尊前幾
番曾見賞音如此不辭醉墨爲題紈扇浪雨閒雲賸香
殘黛莫論恩怨看穠華又老情緣未斷寄樓中燕
憶舊遊

重到金陵

悵麟殘廢井鳳去荒臺煙樹敲斜再到登臨處渺秦淮
自碧目斷雲沙後庭謾有遺曲玉樹已無花向苑寺裁
詩江亭把酒暗換年華雙雙舊時燕問巷陌歸來玉

謝誰家自昔西州淚等生存零落何事興嗟庾郎似我
憔悴回首又天涯但滿耳西風關河冷落凝暮笳

齊天樂

夜宴楊元誠山樓送陳子敬之三山瞿子誠之吳門
闌干十二東風外春藏畫樓鴛鴦蠟炬光濃氍毹坐軟
寶鼎旋培沈火玻璃琖大但有酒須傾有歌須和劇飲
淋浪萬金良夜莫虛過 中年情緒易惡風流青鏡裏
銷減些箇聞雨程賒吳雲驛遠別恨料應如我先拚醉
臥任楊柳煙銷海棠月墮明日江頭倩誰留畫舸

又

臨川夜飲潯陽李輔之寓所

紅霜一樹淒涼葉驚烏夜深啼落客裏相逢尊前細數
幾度雨漂風泊微吟緩酌漸月影斜敲畫闌東角只怕
梅花無人看管瘦如削 江湖容易歲晚想多情念我
歸信曾約塵土狂蹤山林舊隱夢寄草堂猿鶴離懷最
惡是酒醒香殘燭寒花薄一段銷凝覺來無處著
桂枝香

賞桂楊氏山園夜飲花下有作

天香萬斛盡貯入魏臺辟寒金粟誰喚仙娥睡起露妝
煙沐翠雲裙袖黃雲襪倚秋風乍驚郎目恨無明月高
燒蠟炬分陰叢綠 深照見涼禽並宿愛搖豔瓊杯花
影堪掬寸夢絲緣舊約尙堪重續何時卜隱西湖上暮

紺荷芳杜爲屋小山人遠魂招不來謾歌遺曲
木蘭花慢

次韻陳見心文學孤山問梅

壓西湖千樹曾幾度爲攜尊向柳外停櫂苔邊待鶴酒
熟詩溫瀛洲舊時月色悵荒涼惟有數枝存天上梨花
成夢江南桃葉移根如今憔悴客愁村難返暗香魂
甚歲晚春遲角寒笛曉雪暗雲昏登臨不堪寄目但青
山隱隱月紛紛再約與君同醉從他啄木敲門

又

題紅犀扇面

記西湖送別曾共綰綠楊絲悵水去雲回佳期杳渺遠

夢參差重來訪鄰尋里愛卿卿不減舊風姿不著銀箏
清怨難題紈扇相思 暗香銷盡合歡枝留在錦囊詩
又越北閩南秋隨雁影花老鶯兒應緣采春情重便鑑
湖春色戀微之扶起曉窗殘醉潮平月落多時

眞珠簾

壽韓伯清提舉時在平江

銀蟾半露嬋娟影西風早次第中秋天氣涼透小簾櫳
乍夜長遲睡見說靈巖山色好甚也不濃如歸意歸未
趁西冷載酒南園尋桂 還又客裏生朝把金尊綠酒
與誰同醉煙雨隔垂虹望美人秋水桃葉妝樓團扇曲
但小草鸞牋相寄傳示送白蘋一翦碧雲千里

蜨巖詞卷下

河東 張 翥 仲舉

丹鳳吟

幺鳳

蓬萊花鳥記並宿苔枝雙雙嬌小海上仙姝喚起綠衣
歌笑芳叢有時遣探聽東風數聲啼曉月下人歸淒涼
夢醒悵愁多歡少 念故巢猶在瘴雲杪甚閉入雕籠
庭院深悄信斷羈雌遠鎮怨情縈繞翠襟近來漸短看
梅花又還開了縱解收香寄與奈羅浮春杳

高陽臺

題趙仲穆作陳野雲居士山水便面

染黛浮空凝妝佇遠數峰底事含顰十樣新眉從他雨
抹煙勻龍綃便面宜歌舞看亭亭玉骨冰神幾銷魂翠
被餘香錦瑟清塵如今歸去湖山畔對一川平野一
片閒雲兩兩漁舟相過桂渚蘭津誰將玉斧脩明月柰
瓊樓高處無人憶王孫芳草江南啼鴉殘春

百字令

眉閒雁

曉妝乍了又翩翩何許飛來臨鏡欲寄相思無一字拈
起芳心重省鬢彈雲低眉顰山遠去翼宜相映嬌波頻
送恍如秋水涵影幾度揉損啼紅恨卿卿不到吳江
楓冷一點風流應解妒翡翠雙鈿相並忘入香奩時儂

繡枕看足宮花暝多情翦就忍教分做孤月

又

蕪城晚望

碧天向晚遠雲開疑是江南山色渺渺孤鴻殘照外獨
上高城望極雞散臺空螢沈苑廢龍去溝無迹英雄安
在千秋恨血凝碧我欲攜酒重來佛狸祠下字暗蒼
苔石社鼓神鴉渾不見一片青青薺麥夜月瓊枝春風
水調肯慰淹留客翩然歸去天風扶下雙舄

玉蝴蝶

春夢

屏裏吳山深窈宿醒未解午枕初甜膽怯窗虛驚起誤

使人嫌是乳鴉聲聲綠樹是語燕兩兩朱簾轉愁添斜
翹不正墮珥慵拈 厭厭行雲飛去瀟湘江上巫峽峰
尖不盡銷凝海棠月上已窺檐蝶粉寒羞薰翠被燈花
瘦嬾疊香匳倚春纖暗啼妝淚半袖紅淹

東風第一枝

憶梅

老樹渾苔橫枝未葉青春肯誤芳約背陰未返冰魂陽
梢已含紅萼佳人寒怯誰驚起曉來梳掠是月斜花外
么禽霜冷竹閒幽鶴 雲淡淡粉痕漸薄風細細凍香
又落叩門喜伴金尊倚闌怕聽畫角依稀夢裏記半面
淺窺朱箔甚時得重寫鸞牋去訪舊遊東閣

陌上花

使歸閩浙歲暮有懷

關山夢裏歸來還又歲華催晚馬影雞聲暗盡倦郵荒
館綠牋密記多情事一看一回腸斷待殷勤寄與舊遊
鶯燕水流雲散滿羅衫是酒香痕凝處唾碧啼紅相
半只恐梅花瘦倚夜寒誰暖不成便沒相逢日重整釵
鸞箏雁但何郎縱有春風詞筆病懷渾嬾

定風波

商角調

西江客舍酒後聞梅花吹香滿窗醒而賦此

恨行雲特地高寒牢籠好夢不定婉婉年華淒涼客況
泥酒渾成病畫闌深碧窗靜一樹瑤花可憐影低映怕

月明照見青禽相並
素袞正冷又寒香枕上薰愁醒
甚銀牀霜凍山童未起誰汲牆陰并玉笙殘錦書迴應
是多情道薄倖爭肯便等閒孤負西湖春興
八聲甘州

秋日西湖汎舟午後遇雨

向芙蓉湖上駐蘭舟
淒涼勝遊稀但西泠橋外北山堤
畔殘柳依依追憶鶯花舊夢回首冷煙霏
惟有盟鷗好時傍人飛
聽取紅筵象板儘歌回彩扇舞換仙衣
正白蘋風急吹雨暗斜暉
空惆悵離懷未展更酒邊忍又
送將歸江南客此生心事只在漁磯
聲聲慢

九日汎湖遊壽樂園賞菊時海棠花開卽席命賦

西風墜綠喚起春嬌
媿然困倚修竹落帽人來花豔乍
驚卽目相思尙帶舊恨甚淒涼未忺妝束吟鬢底伴寒
香一朵並簪黃菊
卻待金盤華屋園林靜多情怎禁
幽獨蛺蝶應愁明日落紅難觸那堪雁霜漸重怕黃昏
欲睡未足翠袖冷且莫辭花下秉燭

又

揚州箏工沈生彈虞學士浣溪沙求賦

金鑾學士天上歸來蘭舟小駐蕪城供奉新詞幾度慣
賦鳴箏相逢沈卽絕藝爲尊前細寫餘情問何似似秦
關雁度楚樹蟬鳴
我亦從來多感但登山臨水慷慨

愁生一曲哀彈只遣髯變魂驚行期買花載酒趁秋高
月朗風清須盡醉聽江頭腸斷數聲

掃花遊

落紅

洗春雨急碎萬點胭脂蕩空無影館娃骨冷悵香銷麝
土淚殷玉井莫怨東風自古佳人薄命掩鸞鏡縱補得
茜癡妝壞難整芳事誰管領但蜜膩蜂房蘚斑鴛徑
一簾晝永綠陰陰尙有絳趺痕凝彩筆招魂已是繁華
夢醒佇芳景換西湖錦雲千頃

水調歌頭

御河舟中

中夜正無寐何處艣聲來河聲不堪強聒更聽雁聲哀
月色依依偏照霜氣蕭蕭漸緊何以解離懷明發吾無
策惟有快銜杯 過重陽都未見菊花開遙知數叢籬
下破藥映書齋三十六陂煙水二十四橋風月天遣幾
時回傳語閒鷗鷺相望莫驚猜

又

己丑初度是歲閏正月戲以自壽

三十九年我老色上吟髭生辰月宿南斗正合退之詩
今歲兩逢正月準算恰成四十歲暮日斜時臘彘削紅
玉湯餅煮銀絲 炷鑪香飲杯酒賦篇詞蕭然世味前
身恐是出家兒天下誰非健者我輩終爲奇士一醉不

須辭莫問黃楊厄春在老梅枝

鳳凰臺上憶吹簫

聽沈野雲吹簫醉後有賦

琪樹鏘鳴春冰碎落玉盤珠瀉還停漸一絲風嫋悠颺
青冥疑把紅牙趁節想有人記豆銀屏何須數琵琶漢
女錦瑟湘靈追思舊時勝賞醉幾度西湖山館池亭
慣依歌花月按舞娉婷歲晚相逢客裏且一尊同慰漂
零君休惜吳音朔調盡與吹聽

玉漏遲

春日有懷

病懷因酒惱依稀夢裏吳娃嬌小金縷歌殘人去月斜

雲杳怕見樓香燕晚又怕聽啼花鶯曉庭院悄生衣欲
試風寒猶峭窈窕青粉牆低送影過鞦韆驀然閒笑
半朶棠梨微露鳳釵紅嫋近日琴心倦寫更遠信西沈
青鳥虛負了花月一春多少

一枝春

鬧蛾

霧翅煙鬚向雲窗鬪巧宮羅輕翦翩翩鬢影側映寶釵
雙燕銀絲蠟蒂弄春色一枝嬌顫誰網得金玉飛錢結
成翠羞紅怨燈街上元又見鬧春風簇定冠兒爭轉
偷香傅粉尙憶去年人面妝樓誤約定何處爲花留戀
應化作曉夢尋郎採芳徑遠

滿江紅

錢舜舉桃花折枝

前度劉郎重來訪
玄都燕麥回首地
暗香銷盡暮雲低
碧啼鳥猶知人悵
望東風不管花狼籍
又淒淒紅雨夕
陽中空相憶
繁華夢渾無迹
丹青筆還留得
恍一枝常見故園春色
塵世事多吾欲避
武陵路遠誰能覓
但有山可隱
便須歸栽桃客

又

次韻耶律舜中樟亭觀潮

望入西泠乍一線
濤頭湧白疑海上
鼉翻山動鵬搏風
積銀漢迢遙槎有信
秋光浩蕩雲無迹
快醉揮吟筆倒

瓊瑰馮夷宅 沙草遠迷煙磧雲樹老 敲宮壁歎潮生
潮落幾時休息事往空遺亡國恨 烏飛不盡吳天碧 正
銷凝何處夕陽樓人橫笛
意難忘

妓楊韻卿以善歌求賦

高韻天成問當時愛愛得似卿卿 江梅風致別楚蕙雪
香清花旖旎月盈盈寫不盡才情把舊遊名謳試數誰
解新聲 詩家只有楊瓊向吳姬叢裏轉更分明金闈
春思怯翠被暮寒生人欲去酒還醒黯此際銷凝待翦
將江雲數尺與染丹青
露華

玉簪

瀛洲種玉總付與花神
月底深劖琢就瑤笄
光映鬢雲斜矗幾度借取搔頭別
試漢宮妝束風露冷幽香半襟
淡佇闌曲 亭亭雪豔愁獨愛粉沁冰筩鬢
撚金粟石上那回磨斷爭忍輕觸
一自楚客歸來珠履舊遊誰續
秋夢起殘妝半簪墜綠
孤鸞

題錢舜舉仙女梅下吹笛圖

江皋空闊更半霎輕風些兒微雪倚樹仙姬翠袖暮寒
應怯閒拈玉龍自品愛冰姿與花爭潔一闕霓裳乍了
又落梅初疊 怕曲終人去彩雲絕便夢斷瑤臺春思

愁結□□□□□□□□□□
數聲啼咽留得餘香滿袂已西山斜月
那堪綠毛么鳳向苔枝

江城梅花引

九日杏梅同開汪國才折以請賦

玉兒睡起帕蒙頭更嬌柔見郎羞縞袂仙人一笑豔明
眸粉瘦紅愁春夢斷畫闌畔對西風憶舊遊憶君恨
君思悠悠怕淒涼不耐秋豔絕韻絕香更絕特地風流
宜與雲鬢雙插倚妝樓月又漸低霜漸冷花似雪滿蒼
苔總是愁

洞仙歌

辛巳歲燕城初度

功名利達任紛紛奔競縱使得來也僥倖老眼看多時
鐘鼎山林須信道造物安排有命 人生行樂耳對月
臨風一詠一觴且乘興五十五年春南北東西自笑萍
蹤久無定好學取淵明賦歸來但種柳栽花便成三徑
最高樓

爲山村仇先生壽

方寸地七十四年春世事幾浮雲躬行齋內蒲團穩耆
英社裏酒杯頻日追遊時嘯詠任天真 喜女嫁男婚
今已畢便束帛安車那肯出無一事挂閒身西湖鷗鷺
長爲侶北山猿鶴莫移文願年年湯餅會樂情親
風入松

廣陵元夜病中有感

東風巷陌暮寒驕，燈火鬧河橋。
勝遊憶徧錢塘夜，青鸞遠信斷難招。
蕙草情隨雪盡，梨花夢與雲銷。
客懷先自病無聊。
綠酒負金蕉，下帷獨擁香篝。
睡春城外玉漏聲遙，可惜滿堦明月更無人爲吹簫。

又

清明日湖上卽事

尋春春在鳳城東，羅帕玉花驄。
美人半鞞垂鞭袖，遊塵遠目斷雲空。
淺碧湖波雪漲，淡黃官柳煙蒙。
相如多病賦難工。
宿酒更頻中歸來，自按新聲譜憑誰解唱與。
東風一夜小窗疏雨，杏花明日應紅。

婆羅門引

七月望西湖舟中觀水燈一鼓歸宴楊山居山樓達曙

暮天映碧玻璃十頃藥珠宮金波湧出芙蓉誰喚川妃
微步一色夜妝紅看光搖星漢起舞魚龍月華正中
畫船漾藕花風聲度鸞簫縹緲雁柱玲瓏酒闌興極更
移上瓊樓十二重殘醉醒煙水連空

江神子

吳門席上羅生求賦

闔閭城外綠楊枝一絲絲比吟髭比似吟髭不似少年
時賸欲同攜尊酒去青翰舫縷金卮故人相見減風

姿淡胭脂比紅兒比似紅兒扶醉索新詩明日片帆江
水遠人去也又相思

又

惜花

牡丹芍藥冠池臺縷金杯錦雲堆最恨顛風橫雨故相
催國色天香虛過了紅片片臥蒼苔綠陰籬落暗香
來野醪醺刺玫瑰照眼遺芳爛漫趁晴開縱使專春春
有幾花到此已堪哀

又

枕頂

合歡花樣滿池嬌用心描數鍼挑面面芙蓉閒葉映蘭

茗刺到鴛鴦雙比翼應想像爲魂銷
巧盤金縷綴倡條
隱紅綃翠妖饒
白玉函邊幾度墜
鸞翹汗粉啼紅容
易
腕須愛惜可憐宵

感皇恩

題趙仲穆畫凌波水仙圖

湘水冷涵秋行雲平貼時見驚鴻度蘋末霧鬢煙佩微
步一川涼月軟波擎不定龍綃襪
楚楚紺蓮愔愔瑤瑟照影明璫兩清絕
汜人何處起舞爲誰輕別數峰江上晚和愁疊

行香子

山水便面

佛寺雲邊茅舍山前樹陰中酒旆低懸峰巒空翠溪水
清漣只欠梅花欠沙鳥欠漁船無限風煙景趣天然
最宜他隱者盤旋何人村墅若箇林泉恰似敲湖似枋
口似斜川

又

止酒五首

酒量無多不飲從他看黃壚似隔山河淵明自止醉尉
誰呵也莫豪吟莫狂舞莫高歌鷗外風波蝸角干戈
算百年一夢南柯閱人傳舍隨處行窩便富熏天氣蓋
世待如何

又

謝董糟北罷醉鄉侯更開除從事青州長瓶儘臥大白
休浮本欲成歡翻引病不銷愁 今日空喉明日扶頭
甚寶中資下堪羞客應瞋斷婦不須謀指水爲言山作
誓有盟鷗

又

傳癖詩逋野逸山臞是幽人平日稱呼過如飯袋勝似
錢愚儘我爲牛人如虎子非魚 石銚風鑪雪盃冰壺
有清茶可潤腸枯生涯何許機事全疏但伴牢愁盤礴
羸鼓隴胡

又

水遠天低雪意垂垂火鑪頭煨芋然萁蒲團穩坐紙帳

低圍且放些慵補些拙學些癡
休惹羣兒唱起銅鞮
笑山翁醉倒如泥誰分螺贏莫近鷗夷把獨醒人沈醉
者兩忘機

又

擾擾閭浮清濁同流費精神補喜填憂歲云暮矣卿可
歸休有板支頤書遮眼被蒙頭
螻蟻王侯華屋山北
待他時老去優游築閒茅屋買箇黃牛種芋成區瓜作
圃稻盈疇

破陣子

七夕戲詠

此夕天孫河鼓多情駮女癡兒鵲駕年年仍遠渡蛛合

家家長巧絲星期莫怨咨
迢遞金釵私語淒涼紈扇
宮詞奔月姮娥催去路行雨巫山空夢思都無重會時
定風波

崑山路漕席上

舞袖歌鬟簇畫堂就中偏是展家娘待道無情還有思
恰似崑山日暖鳳求凰海上潮生人盡醉催起蘭舟
分散不成雙回首玄都春夢裏從此桃花應自怨劉郎
蝶戀花

柳絮

陌上垂楊吹絮罷愁殺行人又是春歸也點點飛來和
淚灑多情解逐章臺馬瘦盡柔絲無一把細葉青鬢

閒卻當時畫惆悵此情何處寫黃昏淡月疏簾下
漁家傲

舟行自西溪至秦川荷花一望百里雲錦中

紅白芙蓉千萬朶水仙恰試新梳裹縞袂霞衣爭婀娜
香露墮淩波忽載行雲過正好玩芳停畫舸尊前自
唱無人和惟有沙鷗三兩箇飛近我夜涼同向花閒臥
臨江仙

次韻山村先生賦柳

搖蕩春光湖上路多情偏識倡條畫船繫在赤闌橋花
飛人別處綠暗雨休朝惱亂東風扶不起空憐燕妮
鶯嬌舞衣香冷董嬌嬈相思無限恨猶似舊宮腰

又

梁山舟中二首

羨殺漁家生處樂，隔灣數點青燈蓑。
衣忘在石磯，層蓼花秋釀酒楓樹晚垂簷。
時向瓦甌篷底醉，往來鷺侶鷗朋老翁倚棹坐。
曹騰有魚吾欲買，搖手不能磨。

又

羨殺漁村無畔岸，茫茫楊柳蒹葭雨餘秋。
漲沒汀沙驚鴻投別渚，浴鳥坐沈槎。
殘日籬頭閒曬網，垂髻來賣魚。
鰕得錢沽酒徑歸家，一聲橫笛外煙火隔蘆花。

唐多令

寄意篁篔曲

花下鈿篋篋尊前白雪謳記懷中朱李曾投鏡約釵盟
心已許詩寫在小紅樓忍淚上雲兜斷魂隨彩舟等
閒閒惹得離愁欲寄長河魚信去流不到白蘋洲

虞美人

題臨川葉宋英干林白雪多自度腔宋英自號峰居
干林白雪花閒譜價重黃金縷尊前自聽斷腸詞正是
江南風景落花時紅樓翠舫西湖路好寫新聲去爲
憑宮羽教歌兒不道峰居才子鬢如絲

南鄉子

驛夫夜唱孤雁隔舫聽之令人淒然

野唱自淒涼一曲孤鴻欲斷腸恰似竹枝哀怨處瀟湘

月冷雲昏覓斷行
離思楚天長風閃青燈雨打窗驚
起小紅樓上夢悠揚只在佳人錦瑟傍

又

秋日湖上賞木芙蓉

秋色照波明夾岸芙蓉似錦城
罨畫樓臺紅粉面輕盈
未許黃徐寫得成一舸載楊瓊
共醉花前玉笛聲
猶記青鸞和月跨三生
我是仙家石曼卿

鵲橋仙

丙子歲予年五十酒邊戲作

功名一餉風波千丈已與閒居認狀
平生一步一崎嶇
也攬到盤山頂上
梅花解笑青禽能唱容我尊前疏

放從今甘老醉鄉侯筭不是麒麟畫像

又

予生丁亥歲戊子日今戊戌歲初度亦戊子日偶作
生朝戊子今朝戊子五十八年還是頭童齒豁可憐人
也召入詞林修史 前生偶爾後生偶爾但喜心頭無
事從來不解學神仙怎會得長生不死

鷓鴣天

爲朱氏小妓繡蓮賦三首

半臂京綃穩稱身玉爲顏面水爲神一痕頭導分雲綰
兩點眉山入翠顰 丹杏小碧桃新雛鶯恰囀上林春
平生慣是聽歌耳除卻蓮兒只一人

又

一曲吳歌酒半酣
聲聲字字是江南
書憑仙苑青鸞遞
花助妝樓粉蝶銜
飛燕瘦寶兒愁
已妍還慧更巖巖
無因翦得湘江水
與蘸春雲作舞衫

又

乍學琵琶已斷腸
錦綵銀甲玉懸璫
春風瓊樹聲逾穩
秋水芙蓉字亦香
微斂笑淺勻妝
何須重覓杜韋娘
休教月底清歌去
怕趁行雲上鳳凰

浪淘沙

臨川文昌樓望月

醉膽望秋寒
星斗闌干
小窗人影月明閒
客裏不知歸

是夢只在吳山 行路自來難長
缺休彈黃塵到底
沈
儒冠一片白鷗湖
上水閒了漁竿

摘紅英

春雨惜花

鶯聲寂鳩聲急柳煙一片
梨雲溼驚人困教人恨待
到
平明海棠應盡青無力
紅無迹殘香賸粉那禁
得天
難準晴難穩晚風又起
倚闌爭忍

戀繡衾

春晴中酒

醉鄉殘夢鶯喚醒見柳梢
日影弄明又誤了尋芳
伴減
東風庭院笑聲玉兒扶起
仍嬌困索櫻桃芳露解
醒

縱病也心情好比別離滋味較輕

惜分飛

寫夢

相見依然人似舊比似年時較瘦笑問平安否不言低
掩羅衫袖便欲窗前推枕就無奈紅儂綠愁驚起空
回首半牀斜月疏鐘後

太常引

素娥風韻自天真似回雪趁行雲眉黛任長顰正宜看
啼妝未勻扇犀輕按袖羅低掩一曲廣陵春飛盡畫
梁塵曾數到梨園幾人

朝中措

湖堤晚歸望葛嶺諸山倒影水中昔趙文敏公常欲
畫此故及之

梅花處處滿枝開酒力蕩吟懷煙染藏鴉萬縷東風扶
起春來幽禽啼樹戲魚跳日水碧如苔若箇仙翁畫
得翠微倒影樓臺

憶秦娥

江南北金鞍一去空消息空消息雞聲月店雁聲霜驛
春醪誰道濃無滴十分滿引渾無力渾無力離愁如
海怎生乾得

又

金杯側東風易醉多情客多情客送君南浦送春南陌

落花巧妒羅裙色舞紅變盡休輕拆休輕拆待他歸
看舊時寬窄

清平樂

盛子昭花下欠伸美人圖

階前晝永繞石芭蕉影半鞦韆雲鬟慵不整寂寞朝醒乍
醒湘裙翠被風流背人無限嬌羞玉腕一雙跳脫欠
伸渾是春愁

又

寄山居道人約看杏花

東風陣陣第幾番春信
騃李癡桃消息近
寫取鸞牋試問
君家楊柳牆東杏花初吐
生紅好喚一牀金鴈明

朝來醉春風

又

酒後二首

先生醉矣是事忘之矣欲友古賢誰可矣嚴子眞其人
矣 問渠辛苦征鞍何如自在漁竿終辦一北隱計西
湖鷗鷺平安

又

先生醉也甚矣吾衰也萬物不如歸去也陶令眞吾師
也 籬邊菊蕊初黃爲花準備攜觴只恐不如人意風
風雨雨重陽

好事近

寒夜

門外晚風生鼓角城頭欲動霜月滿天如水漸夜深寒
重幽人擁被醉模糊無愁也無夢只有些兒心上怕
梅花清凍

謁金門

寒食臨川平塘道中

溪水漫岸口小橋衝斷沽酒人家門巷短柳陰旗一半
細雨鳴鳩相喚曲港落花流滿兩兩睡紅鷓鴣暖惱
人春不管

又

效前人首句用山人字醉中荅友

山人坐把酒歌呼相和起舞儘教烏帽墮歸來頭不裹
浮世人情歷過身外虛名參破除卻醉鄉無別箇神
仙天地我

又

酒後偶憶

春幾許紅透數枝花雨管領風光誰是主酒邊人楚楚
好與寫將樂府賸與畫教眉嫵醉後不知庭院午隔
簾雙燕語

菩薩蠻

贈雁

人隨雁雁俱南去雁應先到憑傳語若問錦書無人歸

不得書 歸期還信否準在梅花後煙樹短長亭只爭
三四程

又

郎情秋後蕭疏葉妾心陌上悠揚蝶何處望歸鞍春雲
山外山 梨花新月下獨自燒香罷惟有夢相尋驚鳥
啼夜深

浣溪沙

廣陵席上賦別三首

偶約尊前已目成琵琶私語更分明如今翻作斷腸聲
彩扇舊歌憐楚楚青樓薄倖怨卿卿海枯石爛古今

情

又

珍重千金一諾同
小紅樓上舞筵中
誰知別路太怱怱
愁殺二分無賴月
憑將萬里有情風
爲傳消息宋家

東

又

數載相看欲話難
酒邊失口卻成歡
空添別恨與眉端
流水有聲傳錦瑟
行雲無夢赴青鸞
關河秋雨客窗

寒

又

臨川別席

昨夜花前送玉鍾
綠鬟歌罷落梅風
不知離思爲誰濃

醉語低回銀燭背
夢雲重疊繡幃中
只愁歸路見芙蓉

蓉

又

一點芳心兩翠蛾
惱人離緒不勝多
尊前忍聽渭城歌
花落烏啼春去也
水長天遠客愁何
此情何處託微波

波

點絳脣

舟行書見

風起雲飛蘭舟競
入橫塘住惱人何處
隔岸花籠霧
一水盈盈難送
凌波步空相覩
正如牛女隔斷
銀河路
昭君怨

昔人賦昭君詞多寫其紅悲綠怨作此解之

隊隊羶車細馬簇擁闕氏如畫卻勝漢宮人閉長門
看取蛾眉妒寵身後誰如遺塚千載草青青有芳名
如夢令

月似二年前好人比二年前老今夕又鯨川但欠酒杯
傾倒聞道聞道三徑漸荒秋草

鷓鴣天

贈泉南琵琶妓

玉手琵琶半醉中從容慢撚復輕攏青衫司馬情偏感
翠袖紅蓮藝更工花淡泞月朦朧歸來無語立東風
汗巾紅漬檳榔液錯認窗前唾繡絨

踏莎行

江上送客

芳草平沙斜陽遠樹無情桃葉江頭渡醉來扶上木蘭
舟將愁不去將人去薄劣東風天邪落絮明朝重覓
吹笙路碧雲紅雨小樓空春光已到銷魂處

又

題趙善長王元章爲楊垓合寫三友圖

雨澗天寒孤山雪後美人空谷誰爲友香林有路玉煙
深瀛洲無夢朝雲瘦照影冰壺含情翠袖寫生合在
徐黃手仙家花月鎮長春與君歲晚同三壽

蛻巖詞校記

卷上

瑞龍吟

勝處

原本勝作深按是字應去斷賜字倒从

本注

多麗

頭導

原本導作

又鳳

綠

港

原本港作

又晚

空留

在詞綜在

歌聲

汪本聲

摸魚兒

蘇記

還

原本又作

有从傳

金縷詞

西子

滄江

原本滄作

又煙

雲揉

汪本雲

沁園春

汝客

炎州

雲在

豪奢

汪本州作洲在

况

一

又上天空留意原本汪意字

風流子兩荷雲羅汪本雲

解連環 離尊飲淚汪本作離

南浦 青旗原本上

花心動 誤報汪本報

石州慢兩煙雙鸞 待到盡開汪本鸞作雙

水龍吟樓寶舞罷 釵筵汪本罷作頭

桂枝香原本詞下注珠簾一闕俱入下卷今從厲本

卷下

東風第一枝 記半面原本汪記字

定風波 便等閒原本汪本

聲聲慢西風見劉辰翁按此闕又舊恨須溪詞恨作子

又金鑾題原本以金木彈字

水調歌頭中夜過重陽金本近

又十三題錢衍石曰水調歌頭一首削紅玉汪本削

玉漏遲閒笑汪本閒

滿江紅入望鼇翻山動原本翻山二

感皇恩紺蓮汪本紺

行香子癖傳伴牢愁按伴當

臨江仙羨殺沈槎汪本沈

虞美人教歌兒汪本教

鵲橋仙朝生題錢衍石曰考仲舉本傳卒於至正二十

四年丁亥也而戊戌爲七十二歲與詞中稱五十八年不合疑戊戌爲甲申之誤蓋至正四年也

菩薩蠻

人隨

還信否

汪本信作定

信

踏莎行

芳草

紅雨

江原本

汪本作

趙待制詞目錄

玉耳墜金環

浣溪沙二

憶秦娥

蹋莎行

攤破浣溪沙

蝶戀花

浣溪沙

蝶戀花

南鄉子

人月圓二

江城子二

燭影搖紅

水調歌頭

木蘭花慢

久...

水...

...

...

...

...

...

...

...

...

...

...

...

...

...

趙待制詞

吳興 趙 雍 仲穆

玉耳墜金環

乳燕交飛曉鶯輕囀花深處畫堂簾幕捲東風晴雪飄
香絮猶記當時院宇悄寒輕梨花暮雨繡衾同夢鴛枕
雙敲綠窗低語春已闌珊落紅飄滿西園路強拈針
線解春愁只是無情緒無柰年華暗度黛眉顰柔腸萬
縷章臺人遠芳草和煙萋萋南浦

浣溪沙

楊柳樓臺鎖翠煙楊花簾幕撲香絲佳人何處隔江山
芳草已生千里恨玉笙吹徹五更寒夜深和淚倚闌

干

又

落盡楊花滿地春綠陰如淬淨無塵日長庭院掩重門
斜墜金釵寒半鞞淡妝香臉粉輕勻相思偏是少年

人

憶秦娥

春寂寂重門半掩梨花白梨花白芳心如醉暗思當日
金釵欲墮烏雲側佳人望斷天涯客天涯客今年又
過清明寒食

蹋莎行

畫角聲殘金鑪香嫋長空淡淡連芳草朱簾半捲晚霞

明塞鴈無情音信杳
雨散雲收離多會少相思真箇
令人老不須惆悵且開懷一樽滿引愁如掃

攤破浣溪沙

春草萋萋綠漸濃
梨花落盡晚來風
試問相逢何處好
小樓東
朱箔影移無限恨
玉簫聲轉曲將終
獨倚闌干誰是伴
月明中

蝶戀花

顏色如花膚似雪
嬌眼傳波密意曾低說
羅帶同心愁未結
情多不忍成輕別
別後相思心更切
異日重逢鏡裏花難折
寶篆香消煙漸歇
玉簫吹徹黃昏月
浣溪沙

翠鎖蛾眉別樣濃
羅衣初試怯春風
相思只爲兩西東
簾捲玉鉤雲淡淡
香消金鴨雨濛濛
此情都在不言

中

蝶戀花

枝上流鶯千轉巧
好夢方成又把
人驚覺
臨鏡慵妝眉
淡掃羅衣寬盡
腰肢小
別久啼多音信少
應是嬌波
不似當年好
簾捲東風深院
悄落紅滿地成芳草

南鄉子

別久漸生愁
知有音書苦未收
此際多情應盼我
凝眸
帶得啼痕上小樓
舉止忒風流
只在城南綠水頭
咫尺藍橋重欲見
無由兩地相思甚
日休

人月圓

人生能幾渾如夢夢裏奈愁何別時猶記眸盈秋水淚
溼春羅綠楊臺榭梨花院宇重想經過水遙山遠魚
沈鴈渺分外情多

又

相思何日重相見山遠水偏長鳳絃雖斷鸞膠難接愁
滿離腸最傷情處鮫綃遺恨翠靨留香故人何在濃
陰深院斜月幽窗

江城子

仙肌香潤玉生寒悄無言思絲絲無限柔情分付與春
山青鳥能傳雲外信憑說與帶圍寬花梢新月幾時

圓再團圓是何年可是當初真箇兩無緣極目故人天
際遠多少恨凭闌干

又

五陵衣馬恣輕肥競新奇亦何爲混處賢愚誰與辨雄
雌任爾刺天何足道終不肯羨雄飛 燕山花落暮春
時杜鵑啼勸誰歸耿耿孤忠惟有此心知天賦我才還
有用應不至負心期

燭影搖紅

新綠成陰落紅如雨春光晚當年誰與種相思空羨雙
飛燕寂寞幽窗孤館念同遊芳郊秀苑香塵隨馬細草
承輪都成腸斷 別久情深幾時重約閒庭院高樓終

日捲珠簾極目愁無限莫恨藍橋路遠有心時終須再
見休教長怨鏡裏孤鸞篋中團扇

水調歌頭

春色去何急春去尙微寒滿地落花芳草漸覺綠陰圓
馬足車塵情味暑往寒來歲月擾擾十餘年贏得朱顏
老孤負好林泉寶裝鞍金作鐙玉爲鞭須臾得志紛
華滿眼縱相謾功名自來無意富貴浮雲何濟於我亦
徒然萬事付一笑莫放酒杯乾

不蘭花慢

恨怱怱賦別回首望一長嗟記執手臨流遲遲去馬浩
浩平沙此際黯然腸斷柰一痕明月兩天涯南去孤舟

漸遠今宵宿向誰家
別來旬日未曾過如隔幾年華
縱極目層崖故人何處淚落蒹葭聚散古今難必且乘
風高詠木蘭花但願朱顏長好不愁會少離多

葯房樂府目錄

滿江紅

糖多令

桂枝香

洞仙歌

滿江紅

最高樓

滿庭芳

念奴嬌

疏影

沁園春

葯房樂府

蘭溪 吳景奎 文可

滿江紅 天台道中

翠逼籃輿天台路樹迷煙際襟袖冷朔風初定露華纔
墜珠斗橫空孤嶂遠金波搖月寒潭碎問劉郎采藥遇
神仙知何地 終不負風雲志還有待江山意想瑣窗
應念故人歸去翠羽梅花山下夢青衫楓葉江頭淚算
郵亭一曲好姻緣何時會

糖多令 雪

春近柳依依天台客未歸任東陽減卻腰圍手撚梅花
吟未了驚眼底雪花飛 相對兩忘機青山陡覺非想

鵝池夜令難違誰道子猷豪富甚銀箬笠玉蓑衣

桂枝香楊潤之得家書

霜凝翠閣漫獨翦燈花斜照羅幕點檢芳心舊事幾多
成錯清愁正爾無聊賴聽梅花數聲殘角小窗風細虛
檐月轉怎禁寥寞笑鬢底年華老卻問前度劉郎何
處重約流水桃花別後幾番開落吾廬三徑歸來好任
緇塵暗迷京索鳳臺人遠雁書頻寄喜占烏鵲

洞仙歌漫興

雲閒倦翼向林邊知倦回首吾廬夢中見
□霜催吟鬢塵宛征衫竟孤負清夜猿驚鶴怨
綈袍空敝卻歲月無情贏得當時故人戀
漫索笑共梅花弄粉吹香怕腸

斷東風庭院柰芳草萋萋怨王孫看江北江南幾回青
徧

滿江紅歸故居答楊潤之

袖拂西風臨古道行行且止遙指處故園三徑歸程十
里老虹青紅疏雨外遠山紫翠斜陽裏更澄江萬頃白
鷗輕天連水銅花鏽貂裘敝空負了平生志慨幾多
往事昨非今是仙沈腰圍緣底瘦愁潘鬢影今如許有
元龍百尺最高樓君來倚

最高樓寄謝國芳

西池草和夢汎晴暉幾度見春歸寒沙盟冷鷗先覺秋
江影落雁初飛故園荒征路遠信音稀笑逆旅光陰

忙似瞥更好染髭鬚何用鑷驚夜杵擣寒衣桃花流水
應無恙小山叢桂更疇依早歸來新酒熟菊成圍

滿庭芳己卯七月十一日得穎

露洗新秋天浮灝氣桐孫初長庭隅綳裁紅錦門左記
垂弧白髮萱親笑道於今見四葉喜榮敷天台路吾兒
知否倩雁報安書 山中何所有石田茆屋菊徑瓜區
更寒窗老硯他日儘傳渠願汝身如犢健看書罷更學
把犁鋤稱鄉里善人可矣卿相又何如

念奴嬌寄蕭善之

絳河明月到中秋不比尋常三五神女夢寒生嫉妬特
地行雲行雨天上嬋娟人閒陰晦悵望成悽楚金尊翠

袖澹然相對無語
遙想天柱峰頭通宵宴賞此地今
何處爭似銀橋侵漢表直入瓊樓玉宇桂樹婆娑羽衣
凌亂偷得霓裳譜素娥應笑醉來狂興如許

又壽暉東陽丁亥正月十三日生推命者丙戌算因戲
及之

東陽老子問天公乞得兩番六十初度孟陬春未到卻
算去年丙戌火樹銀花先開三夜照耀維摩室祇園樹
下爭看無量壽佛人道雙峴峰頭乾坤清氣鍾此彌
天釋挂錫叢林三十載玉檢芝泥猶溼嶺上白雲儘堪
怡悅恐被風吹出法身強健摩挲時問銅狄
疏影爲劉架閣賦贈妓者

縞衣仙子倚東風花信先占春色殢酒含顰脈脈無言
青鳥爲傳消息暗香一點纔浮動早自有東君憐惜想
前身傅粉精神化作飛瓊肌骨還向影娥池上借霓
裳一曲徘徊歌席清夜梨花同夢方甘又似楚雲蹤迹
新歡舊恨知多少算檀板金尊消得折芳馨欲寄相思
人在江南江北

沁園春贈鄭伯洪

谷口仙田瑤草誰栽山中子真向紫霞洞裏鑿開丹室
素華臺上瞻望颯輪王子吹笙洪厓握手爛醉桃花萬
樹春都休問蓬萊清淺天地氤氳有時澡雪精神誦
藥笈丹書小篆文更佩聯明月劒寒秋水或答鸞鳳或

翳麒麟碧落空歌紫虛鬱秀徑挾飛仙拜玉宸
天門近聽履聲直上高步星辰

燕石近體樂府目錄

滿庭芳二

穆護砂

木蘭花慢

望海潮

人月圓二

菩薩蠻四

春從天上來二

賀新郎二

虞美人二

綠頭鴨

望月婆羅門引

水調歌頭

蝶戀花二

清平樂二

如夢令

浣溪沙三

風流子

行香子二

減字木蘭花

南鄉子三

踏莎行

鷓鴣天

西江月

點絳脣

摸魚子

燕石近體樂府

廣陽 宋 綬 顯夫

滿庭芳 汴中寒食

雨意愔愔養花天氣賣餠何處春簫清明上巳車馬正
連朝對酒唱歸時多忘惜花心醉後偏饒凝雲暮青樓
簾捲幾度對魂銷 無聊空悵望東闌雪賸北郭香飄
夢江南行樂水遠山遙深院宇綠窗啼鳥晴寒食寶月
良宵秋千外柳風柔小無力著春嬌

二寒食傷先兄正獻公

魂黯雪山泪零風野轉頭三度清明感今懷舊何事不
傷情文史共梁園書几臯盧對湓浦燈檠經行處洞庭

彭蠡同載赴瑤京 才名人盡羨朝家大宋陸氏難兄

但駑駘小李少後鵬程丹桂樹何論高下紫荊花早變

枯榮微衷苦亂峰如樹幽恨幾時平

正獻與子嘗同寓汴中朝元宮一年

又嘗客九江值除夕共博而守歲後同歸京師赴舉

穆護砂燭泪

底事蘭心苦便淒然泣下如雨倚金臺獨立搵香無主
腸斷封家相妒亂撲簌驪珠愁有許向午夜銅盤傾注
便不似紅冰綴頰也溼透仙人煙樹羅綺筵前海棠花
下淫淫常怕鳳脂枯比洛陽年少江州司馬多少定誰
如 照破別離心緒學人生有情酸楚想洞房佳會而
今寥落誰能暗收玉筯算只有金釵曾巧補輕溼了粉

痕如故愁思減舞腰纖細清血盡媚臉膚腴又恐嬌羞
絳紗籠卻綠窗伴我檢詩書更休教鄰壁偷窺幽蘭啼
曉露

木蘭花慢題蛾眉亭

喚山靈一問螺子黛是誰供畫婉變雙蛾蟬聯八字雨
澹煙濃澄江嬋娟玉鏡儘朝朝暮暮照嬌容只爲古今
陳迹幾回愁損渠儂 千年鬢蹙漫情鍾慘綠帶雲封
憶賞月天仙然犀老將此恨難窮持杯與山爲壽便展
開脩翠恣疏慵要似絳仙媚嫵更須嵐靄空濛

人鳳舸殿脚
女善作眉嫵

望海潮海子岸暮歸金城坊

山含煙素波明霞綺西風太液池頭馬似游龍車如流
水歸人何暇夷猶叢薄擁金溝更蕭蕭宮樹調弄新秋
十里煙波幾雙鷗鷺兩漁舟暮雲樓閣深幽正砧杵
丁東絃管咽啾澹澹星河熒熒燈火一時清景難酬馬
上試冥搜填入耆卿譜摹寫風流明日重來柳下攜酒
教名謳

人月圓中秋小酌

紅螺香灩金莖露清興溢璇霄玉盤光冷雲鬢霧溼丹
闕煙銷 □□此夜明年明月何似今宵西風喚我瑤
階折桂綺檻吹簫

二誠夫兄生子名京華兒

神州佳麗明光錦生出玉麒麟四筵都愛西山眉翠太
液瞳神 他年應是鬪雞走馬紫陌紅塵這回休更燕
秦樹栗江浦垂綸

菩薩蠻送遼西憲孫掾還司延祐己未樂亭縣作

紫髯如戟霜臺掾風生彩筆來行縣邂逅海天涯盍簪
能幾時 柳梢春尙冷無物堪持贈爲謝幕中蓮殷勤

寄短篇許可用時
在憲幕

二丹陽道中

西風落日丹陽道竹岡松阪相環抱何處最多情練湖
秋水明 驛城那憚遠佳句初開卷寒雁任相呼羈愁
一點無

三衛州道中至元四年十一月與八兒思不花御史同行按行河南四道

兩歧流水清如酒草根風蹙冰皮皺雪淨太行青聯鑣看畫屏按行多雅志解起澄清志回首五雲天東華塵似煙

四偃師道中

北芒古冢紛無數崔嵬羅列成山阜何處斷碑橫無人知姓名今墳如蟻垤回首成磨滅今古兩堪哀停驂酌綠苔

春從天上來壽張惟健五月十六日

帝敕朱明擁丹穴仙雛表瑞昇平天上公子齊岱精英

玉樹照映神京渺翩翩紈袴有誰似閒氣立成妙才情
擅鍾王筆意韋杜詩聲薰風黑頭初度笑時世紛紜
舞雪歌鶯燕子簾櫳葵榴庭院天壤至樂難名邈軒裳
奕世青雲步紫綬華纓八千齡看緇衣父子赤烏公卿

自號至樂齋

二至元六年庚辰元日立春將爲山南僉憲按部至應
城縣作此詞奉寄許可用大參陳景議憲副

旭日噉噉爛春餅堆盤壽酒盈尊玉帛交錯襟佩翩翩
想像虎豹天門靄蓬萊雲氣布淑景漸徧乾坤黯銷魂
杳洋洋韶濩赳赳囊鞬昇平萬方元會念去國孤懷
盛事誰論黃閣儒臣烏臺舊客曾是執法調元望蒲騷

小邑纔咫尺寂莫山村撫嬋娟料梅邊傾倒回拜天恩
賀新郎壽劉時中五月廿又八日

繡陌經新雨致昇平五絃琴裏薰風吹戶夏館深沈晨
容好寶鼎紅雲香霧還是逋仙初度疇昔驂鸞騎赤
鳳遡西清佳處凌雲步天壤外快豪舉 遨游又作湖
山主百千回笑談詩酒盤桓容與未信星星能侵鬢青
鏡流年如許畢竟到廣寒天府多少文章眞事業鶴南
飛白媿無佳語絃寶瑟勸霞醕

二徐復初池亭聽雨軒至治辛酉時予將之湖南

銀竹能宮羽向荷盤跳珠膈膊花奴羯鼓瀏瀏泠泠春
泉口滴盡槽頭香醕愛徽外遺音太古暗度松筠時淅

瀝恍吳娃昵枕傳私語君試聽有佳趣主人未解離
愁苦對涼秋芭蕉巨葉梧桐高樹夢斷羅裙天如漆一
寸鄉心淒楚楚點點是寂寥情緒明日孤舟成獨往更難
堪長夜瀟湘浦憑曲檻且容與

虞美人寄壽周子善二月十一日

暖風金鼎香醺醪想像人如玉天南地北兩心期爾汝
忘形如願定何時夫君正自章臺柳壽相人希有吟

餘時復飲丹砂何必求仙遠訪稚川家

武陵城中有丹砂井里人相傳

飲之者壽周武陵人也

二福州北還雨中觀梅

十年久共梅花別乍見殊佳絕臘前風景雨中天翠竹

青松恰似映清妍
繇枝開徧香成陣
觸目忘離恨
玉人誰使似冰肌
酒罷歌闌一晌又相思

綠頭鴨送張仲容過維揚復之錢塘結婚正月二十日

出京是其壽日也

緩搖鞭銷魂橋上留連
恰春波鴨頭新綠
倉皇便買吳船
就華堂溶溶壽酒
作繡陌草草離筵
傾蓋論交分袂
怨別春風秋月
僅經年都門道
紛紛輕薄餘子
正堪憐
夫君妙心期湖海
意氣雲天
便明朝拂衣徑去
天涯
幽恨無邊
暮維舟沙鷗颺雪
春市酒淮柳垂煙
綠水迢迢
青山隱隱
浙江雲擁
洞房仙對
西湖煙濃
雨澹
小
占芳妍
歸來好扶搖
九萬水擊三千

望月婆羅門引江上晚泊

短衣烏帽京塵眯目強鑽頭夢中八表神游今日江山
佳處便欲賈胡留愛峰嵐滴翠天水涵秋斷霞漸收
見隱隱兩蛾愁好在九華煙樹秋浦沙鷗相看依舊但
憔悴潘郎俗狀羞孤負卻嘯傲林北
水調歌頭寄誠夫兄在江南時兄在史館校讐先朝寶

錄

登車就長路曉日照皇州風吹紫荊花落那更別離憂
咫尺天南地北想像雲窗霧閣人在古瀛洲粉筆校書
罷烏帽拂塵游出銀臺心浩浩思悠悠人閒萬事姑
置食邑素封侯收拾金鑾遺事記取玉壺清話此外復

何求勳業好看鏡綠鬢不禁秋

蝶戀花青田舟中

無數好山攢碧樹山下郵亭亭下牽舟路山色娛人相
指顧時時又被灘聲妒寒日光陰容易度雲去雲來
那更商量雨強把鞦韆愁排遣去一尊酒盡青山暮

二河內王幹臣號竹溪

門外紅塵溪上竹竹口瑯玕溪水清如玉溪上主人情
不俗多應每每能無肉千載高標成倏忽六逸飄然
君爲追遐躅莫向溪邊閒濯足我知孺子歌難續

清平樂武陵客舍小酌與田夫相對酬酢聞農師子嘉

諸人方飲他所歡甚

花臺竹塢對雨羅尊俎邂逅田翁同笑語問訊村墟禾黍酒徒咫尺高陽粉營狎坐飛觴一種麴生風味不知誰弱誰強

二車廢道中

青松烏柏寒日來車廢滿目山明仍水秀忍聽玉驄馳驟畫橋掩映山莊酒旗搖曳林塘好在鶯湖春色笑人不暇飛觴

村舍酒帘書鶯湖春色蓋酒名也

如夢令題楊補之施篷墨梅卷中他詩有忍寒背篷立

之語

常記剡溪前度坐拓船窗窺覷棹進任舟移行盡粉香千樹佳趣佳趣篷背詩人何處

浣溪沙崑山州城西小寺晚憩

落日吳江駐畫橈
招提佳處暫逍遙
海風吹面酒全銷
曲沼芙蓉秋的小
山叢桂晚蕭蕭
幾時容我夜吹簫

二壽南陽周文卿八十

生長昇平鶴髮翁
兒郎衣采照方瞳
晨昏甘旨鳳城中
緩步不須鳩杖策
酡顏時藉蟻杯烘
懶將身世應非

熊

三冬日喜晴

萬瓦輕霜愛日明
游絲來往似春晴
幽禽弄暖百般聲
斑竹乍翻經夏籜
綠池猶泛過秋萍
溪橋誰共探梅

行

風流子至元四年七月廿又二日蘇伯脩侍郎舉一兒
子以予同治久交且三子名梯雲拏雲步雲者
方成童就傅乃求倣吾兒制名遂命之曰來雲
繼徵詞以紀事賦此以贈兒已滿彌月矣侍郎
作湯餅會併書呈席上諸公

紺字瑞煙浮仙童小高舉覓真游
霞絢九光徘徊若木日宣五色照耀瀛洲
人爭覩翱翔趨絳闕天矯上崑崙
北幾度驂鸞峨眉東畔有時跨鳳恆嶽南頭
何事暫夷猶儘靑冥遠覽碧落奇搜不數薰香
嫵媚傅粉嬌羞笑襁褓禱人閒羊祜桑弧蓬矢
地上齊州賸費通家

小字袞袞公侯

行香子京山道中

竹院松庭犬吠雞鳴被田家畫出昇平園林掩映鞍馬
經行悵暮天低寒日澹曉風輕 浮世浮名役使神形
霎時閒鬢變星星不憂不懼無辱無榮愛水邊漁林下
隱隴頭耕

二暮抵應城宿縣齋後園

榭葉風乾柏葉霜殷淺坡陀路徑回環喜投公館暫卸
征鞍對竹蕭森松夭矯菊爛斑 歲晏天寒誰共清歡
過黃昏愁恨多端燭花漸暗鑪火將殘更雁聲哀砧聲
急雨聲鱖

減字木蘭花憲掾黃君美弄璋援蘇伯脩侍郎例乞名
其子命之日升雲時二月六日壽席醉賦
春空靄靄兒解飛騰窺五采我製佳名異姓他年敘弟
兄我鬚白早亦願兒年如我老緩步徐行終到蓬萊
最上層

南鄉子觀雲

紺碧峙晴空態度分明巧不同櫺具神君三四輩乘龍
冠佩翱翔赴紫宮樓觀遠玲瓏舞鳳蹲猊刻鏤工一
笑斜川癡老子奇峰便入南窗詩句中

二二月廿又八日君美弄第二雛口前例名之日凌雲

賦此以贈

頭玉太礲礲江夏無雙世胄遙好是三生仙骨重叢霄
曾侍立君絳節朝 咫尺趁扶搖直上鵬程挹斗杓他
日揮毫能作賦飄飄學取成都駟馬橋

三至元六年九月十四日李重山憲副壽日是日適臺
使齋璽書獎諭風憲至山南遂大宴合樂重山號梅
庭主人所居官舍卽舊水犀亭久扁香字

桂宇散秋香咫尺梅庭十月陽紅葉黃花風致好華堂
不比尋常進壽觴 褒詔燦龍光百丈蒼官口丈霜信
是天恩寬似海徜徉就趁笙歌入醉鄉

踏莎行早春景陵道中兼旬陰晦

野燒回青溪梅褪粉路旁新柳鵝黃嫩連陰未放碧波

明峭寒尙阻東風信
咿軋肩輿飄蕭蓬鬢病餘懷抱
無風韻采牋何暇寫閒情
綠尊無分排孤悶

點絳脣沔陽道中

澤國春生葑田青接重湖淺
鴛鳧弄暖得意煙波遠

陰過元宵晴望花朝轉和風扇
羣芳開徧應過京山縣
鷓鴣天題應山縣城南渡蟻橋
橋東數步法興寺卽二

宋讀書處

十萬玄駒過兩堤一雙丹鳳上天池
科名已向生前定
陰德仍從暗裏窺
龍虎榜鵠鵠詩同胞同甲照當時
同宗盛事嗟微異後折蟾宮向下枝

先兄正獻公至治辛酉狀元子則泰

定甲子第三
甲十二名

摸魚子至元六年二月望日登安陸白雲樓樓今爲分

憲公解城中有楚大夫宋玉故宅與池其井名琉璃井有蘭臺故基

屹危闌郢都西北滔滔漢水南去蘭臺陳迹何從訪廢
宅芳池凝竚愁絕處空只有琉璃管井蛙聲聚千年遺
緒邈白雪宮商雄風襟量恍惚可神遇英靈在應念
諸孫莽鹵斯文微福如許蕙肴蘭藉椒漿奠屈景幽魂
同赴驚節序卻邂逅春深不識悲秋苦撫今懷古漫醉
墨淋漓狂歌悽惋和者應無數

西江月王伯脩贈別

烏石驛中長夜小金山下新年誰□蕭寺麥秋天十載

三回相見 今日漢南官舍光陰不得留連何時文酒
再團圓莫待白頭皺面